

21 AUG 1997

Mahathir-China (Bergambar)

MALAYSIA MAHU PELUANG TINGKATKAN EKSPORT KE CHINA, KATA PM

KUALA LUMPUR, 21 Ogos (Bernama) -- Datuk Seri Dr Mahathir Mohamad hari ini berkata Malaysia berharap agar peluang-peluang meningkatkan eksportnya ke China diteruskan, terutama bagi barang-barang pembuatan dan separuh siap apabila republik itu terus meliberalkan perdagangannya.

Perdana Menteri berkata Malaysia yakin kerjasama perdagangan dan ekonomi antara kedua-dua negara akan terus berkembang berikutan prestasi cemerlang ekonomi China.

Beliau berkata demikian pada majlis makan malam meraikan Perdana Menteri China Li Peng di Sri Perdana sempena lawatan rasmi empat hari ke Malaysia bermula hari ini. Yang turut hadir Datin Seri Dr Siti Hasmah Mohd Ali dan isteri Li, Zhu Lin.

Menurut Dr Mahathir, hubungan diplomatik dan politik antara kedua-dua negara adalah seiring dengan kemajuan pesat hubungan ekonomi dua halanya.

Katanya, jumlah dagangan Malaysia-China mencapai RM9.45 bilion pada tahun lepas berbanding RM1.2 bilion pada tahun 1995.

Dr Mahathir berkata, hubungan Malaysia-China dalam bidang pendidikan juga telah berkembang, dan Malaysia mengalu-alukan penubuhan Pusat Kajian Melayu di Universiti Pengajian Luar Beijing.

"Adalah diharapkan penuntut-penuntut China yang berhasrat melanjutkan pelajaran mereka di Malaysia akan melengkapkan diri mereka dengan pengetahuan asas Bahasa Melayu di pusat itu sebelum datang ke Malaysia," katanya.

Berhubung kerjasama China-Asean, Dr Mahathir berkata pewujudan hubungan dialog menandakan era baru kerjasama China-Asean. China merupakan rakan dialog penuh Asean sejak tahun lepas.

"Asean dan China mempunyai peranan yang utama dalam meningkatkan keamanan, kestabilan dan kemakmuran di rantau ini. Sehubungan itu, Malaysia mengalu-alukan penyertaan Presiden Jiang Zemin di Sidang Kemuncak tidak rasmi Asean pada Disember ini," katanya.

Perdana Menteri berkata sokongan China terhadap cadangan Asean supaya negara-negara Asia Timur terlibat dalam pertukaran pandangan mengenai soal keamanan, kestabilan dan pertumbuhan ekonomi rantau ini, adalah dihargai.

Dr Mahathir turut menyatakan penghargaan terhadap penyertaan aktif China dalam projek-projek di bawah Kerjasama Pembangunan Asean-Lembah Mekong (AMBDC), serta keyakinan terhadap pencapaian matlamat AMBDC dengan sokongan China.

Mengenai pergolakan di Kemboja, beliau berkata, Asean mengalu-alukan sumbangan China dalam usaha bersama mencapai penyelesaian damai di Kemboja.

Mengenai masalah di Semenanjung Korea, Dr Mahathir berkata, sumbangan China dalam proses rundingan damai empat negara beserta Korea Selatan, Korea Utara dan Amerika Syarikat akan membantu ke arah penyelesaian berkekalan.

"Kami di Malaysia bersedia untuk menyumbang dalam apa juga cara yang terdaya dalam usaha untuk membawa keamanan yang kekal di Semenanjung tersebut. Kita tidak boleh bersikap tidak endah terhadap nasib rakyat Republik Demokratik Rakyat Korea ketika mereka memerlukan bantuan makanan dan keperluan asas untuk hidup akibat kebuluran," katanya.

Dalam ucapannya, Dr Mahathir turut mengucapkan tahniah kepada China di atas kejayaan mengambil alih semula secara aman kedaulatan Wilayah Pentadbiran Khas Hong Kong baru-baru ini, dan menyatakan keyakinan hubungan Malaysia-Hong Kong akan menyumbang kepada hubungan keseluruhan

Malaysia-China.

Dalam ucapan balasnya, Li berkata Malaysia telah mengekalkan pertumbuhan ekonomi yang pesat, mencapai kejayaan dalam membentuk negara dan kini berusaha menjadi sebuah kuasa perindustrian menjelang 2020.

"Malaysia telah mengambil bahagian secara aktif dalam hal ehwal serantau dan antarabangsa. Ia telah mendukung keadilan dalam hal ehwal antarabangsa dengan mencabar kuasa-kuasa besar dan bekerja dalam membangun secara bersama negara-negara dunia ketiga, sesuatu yang kami hargai dan kagumi," katanya.

Katanya menerusi usaha gigih kedua-dua negara, hubungan persahabatan dan kerjasama akan mengalami pengalaman yang baru dan meningkat.

Mengenai Asean, Li berkata kumpulan itu telah memainkan peranan yang semakin meningkat dalam hal ehwal serantau dan antarabangsa.

"China dan Asean kini berhubungan dalam kerjasama menyeluruh yang membuah hasil. Kami di China ingin bersama-sama negara-negara Asean mewujudkan suasana yang mesra dan mengadakan hubungan yang baik dengan jiran-jiran dalam kurun ke-21 kelak," katanya. -- BERNAMA

RAZ AHH